

928
コ
2

攻
媿
集



攻媿集卷三

宋

樓

鑰

撰

古體詩

送制帥林和叔歸

使君一何清鶴骨天與瘦少年場屋聲六藝飽芳漱一
行起作吏所立已不苟立朝凜大節論事幾及雷發言
必體國平正無矯揉藜藿爲不採風采照宇宙出入有
本末眼見凡三就來不爲苟合薦召乃結綬去亦不好
高三宿徐出書天官豈不貴陳義堅素守贛川嘗報政

復來守鄞鄞不求赫赫名實出龔黃右情僞千萬端到
眼輒空透撫民過嬰兒閭里息爭鬪茲胥及強吏時用
霹靂手人誦南山判情通理亦究六邑俱帖靜稱贊不
容口律身至嚴冷無能掣吾肘吏事精且勤呼燭侵夜
漏公退入家塾諸孫後來秀吏卒不識面雖誦出牕牖
幾年南塘路來往困僵仆一朝平似掌行歌紛老幼公
心信如水古井波不皺榮觀處超然軒冕亦何有翩翩
欲賦歸排雲屢騰奏廟論終不許斯民方借寇上心重
閔勞祠官向廬阜闔境極攀戀人人懷杜母君看臥轍

人誰能使奔走挽須不得留百拜願公壽老我幸同朝
傾蓋已如舊聯事東西省交情久益厚我歸公亦來門
戶託雲覆黃堂間參語惟我甥與舅揚旌鳴鼓吹賁此
蓬葦陋清談不及私翁歸況不受義命孰不知踐履或
差謬惟公見善明力行真耐久有時相與言心同蘭茝
臭摻袪寧忍別追送列觴豆公雖不好飲勉爲引醇酎
公去我亦隱菽水翻綵袖花溪渺何許望望幾雙埃千
里共月明懷人重搔首惟應折梅花臨風爲三嗅

賦揚州伯父海檜

潛虬拔地徑天矯騰拳勢出青雲表爲誰猶向此中蟠
坐閱春秋昏復曉團團蓋月輪平蠹蠹蒼叢衆星小
枯槎當面結生香外有霜皮細勾遶乃知造化有神巧
散作樛枝窮樹杪雖非直幹棟梁材怪怪奇奇樂幽窈
獨秀海山臨浩漾駭浪翻空雲縹渺茁芽自有甘露滋
弄影幾經霜月皎崢嶸老氣本天然後生矯揉何時了
我家揚州真好事員歸但覺千金少夜半有力欲負之
護持和璧終歸趙從來寫照無髣髴畫師欲快毫端掃
解衣盤礴意慘澹卷起生綃色徒悄我來青邊立寒峭

自憐氣與秋天杳倚筇一笑賓亦歡開尊相與傾清醪
謂當好此如好賢爲君三復緇衣篇時時來前看不足
終待結屋平湖邊

跋碁北海扈從書事詩

晉陽固自有高共奉天豈可無宣公當時扶日滄海東
尚想健筆驅長風指揮諸將如奴童中興內相當推功
斷碑毋庸詫詩工制藁具在鑾坡中

送萬耕道帥瓊管

黎山千仞摩蒼穹顚顚獨在大海中自從漢武置兩郡

黎人始與南州通歷歷更革不勝計唐設五筦如容豈
皇朝聲教久漸被事體全有中華風生黎中居不可近
熱黎百洞蟠疆封或從徐聞向南望一粟不見波吞空
靈神至禱如響答征帆飽掛輕飛鴻曉行不計幾多里
彼岸往往夕陽春琉球大食更天表舶交海上俱朝宗
勢須至此少休息乘風徑集番禺東不然舶政不可爲
兩地雖遠休戚同古今事變無定論難信捐之與揚雄
四州隅分各置守瓊臺帥閩尤尊崇高牙大纛擁方伯
鼓吹振響驚蛟龍漢家威名兩伏波盧丁以來幾宗工

衛公精爽尙如生妙語況有玉局翁使君吏事素高了
明若古鏡摩青銅叱馭行行不作難平生惟仗信與忠
布宣王靈萬里外益使向化來蠻竇頑獷未率宜以漸
勿示駭政先含容平平之策用定遠下下之攷書陽公
吏臣生長固安土尚當摩撫如童蒙屬僚宦游豈得已
士多失職悲途窮名分尊卑不可紊更念何處不相逢
官事旣了兩無間可使和氣俱沖融鄉閭惜別情所鍾
臨岐爲傾琥珀濃手遮西日念遠去欲留奈何鼓蓬蓬
願君穩度三合溜早歸入侍明光宮

寄題高汝一少卿識山堂

廬山之高誰不識欲識其真了難得往來山中最親切
嶺爲橫看峯是側曾從彭蠡望山外識得山南昧山北
山體如一本不動人苦求之愈多惑君構一堂據湓城
香爐五老皆嘉賓莫問前後與向背面目還君多識真
君今與山如故人慎毋忽作白頭新堂中燕坐靜且壽
君其于此知吾心

侍仲舅同諸表游山

來游大梅山陟山知幾重平行十仞岡俯瞰他山峯一

步一步高勢欲凌虛空左顧九地底樓臺鳴鼓鐘蓬萊
反在下直恐船引風又疑海水竭洞見馮夷宮行行愈
就順故步尋苔封十年舊主人相對如夢中清談虛閣
上坐到夕陽春年來頗畏影掣身慕冥鴻入山非不深
猶有行人蹤安得更深處尙友荷衣翁未問梅子熟寧
能噉青松庶幾適吾心餘生得從容

大梅山

此山名大梅驅車入山麓試問山中人山名竟誰屬禪
家開道場爲說梅子熟僊家指爲巖曾此隱梅福或云

古有梅其大蔽山谷至今二梅梁靈響皆其族他山抗
驚湍禹祠橫殿屋三者尙誰憑禪師有遺族餘皆不可
辨安得究圖錄但愛山又山喬林間脩竹

金峨漱石亭

溪聲真是廣長舌歷劫談空聲不絕不知來自何處山
一意傾東忘萬折我欲漱石向水濱無奈齒牙搖落頻
夜半寒聲到客枕只疑身是枕流人

寄題台州倅廳雲壑圖

頃年登臨赤城裏江遶城中萬家市治中寄我雲壑圖

快讀新詩眼如洗回思歲月如星流念念飛空尋舊游
披圖哦詩想幽致直欲攜筇上山頭聞有於菟在岑蔚
晚徑寒鷗敢翔集幾年榛棘蔽颺颺一朝絕境從中出
細路雖非五達康縈迴自覺阻且長萬壑風煙開絕頂
一丘曲折于中藏老砂射日銀星炯梅峽含風襟袖冷
千巖高下各異狀如障如鋒亦如領天景須憑意匠營
山不在高僊則名規樞已定力未暇他時會有滕王亭
風濤隔闕天垂幕安得扣門親剝啄吟詩夢到故山川
睡美不知鐘鼓傳

王原慶新遷居南堂以古風求寫恕齋二大字并

石刻次韻

三槐諸孫有奇士才高特未遇時爾作詩猶能備衆體
短章大篇仍雜擬解紛便掉三寸舌隨陸蘇張何足比
鵬鷲猶未離風塵蛟螭尚爾蟠泥滓平生曳裾向侯門
豪傑聞風親瞻企只今交游亦凋落凜凜一身嗟獨峙
槐陰滿庭渺何在久寓瀛壖成故里瀕湖小樓太孤露
何殊玉川洛城裏邇來深入作郊居高屋好山成二美
未能拔劍斬樓蘭幾欲袖椎摧晉鄙便將拂袖武陵溪

誰能著腳長安市西門性急佩柔韋柳子氣高成曲几
衡宇全似歸柴桑茅茨大勝居僭耳我詩非工字尤拙
荷子愛忘剛見喜夜來縱筆寫恕齋自笑黔驢技止此
更求古刻訪少作頗記醉中曾諾唯舊書紛沓費搜尋
魚鑰未開塵事起呼童卷送三數軸僅可障風同故紙
新詩鼎來亟予和顛字敢追張長史不須更投苦海中
一笑以還隨棄毀徑須攜酒登南堂朗詠白駒三四章
又次韻

投老歸稱前進士時與田夫相汝爾淵明賦歸何敢望

曼容自免差可擬門前爵羅真可設老圃灌畦聊自比
怨齋空洞最相親笑談頗覺清無滓時時過我共銜盃
望望不來予爲企丈夫未遇困泥塗誰識鸞停兼鷓峙
方期從容結詩社相與浮沈向閭里一朝別我欲遠游
欲入桃源深洞裏爲言半隱欲偕行二子風流真儷美
向來早有四方志行盡東南到邊鄙只今名利遂兩忘
爭心無復于朝市祇有哦詩興未闌連得新詩照塵几
調高韻險不易和白雪陽春驚俚耳年登六十鬢未斑
乘興一行若可喜宗盟莫逆素相忘並轡笑談無彼此

湖海豪氣儘收斂以怨名齋幾一唯匆匆摻袂不得留
卮酒未乾人欲起寄聲半隱不吝言空有語離書滿紙
歸時廣和必盈箱寫盡山川詩作史送子纔歸深閉門
莫問是非并譽毀但期遠歸亦升堂西湖仍訪老知章
周伯範棊會以足疾不赴走筆寄坐客

里閭講棊社大要率且真豈惟簡苛禮正欲聚首頻向
來賞花約深恐負此春春來顧多事始如參與辰今朝
怡怡堂坐上凡幾賓默計病或故約略三數人益知會
合難舉酒勿問巡棊枰誰勝負清新想歌唇僵臥一榻

上執熱難屈伸斐然申前盟余將踵後塵

史清翁次前韻覓酒以金川玉友一枕瓶西安酒

一斗送之次韻

社中日相從此意豈不真其初定要約深期往來頻今年苦多故孤負四郊春清和到新秋其間足良辰而我獨抱疴未能會嘉賓近又得玉友風味尤可人思與君痛飲欲招復逡巡忽焉得新酒亟遣徑入脣別有酒一斗併使君意伸我雖不敢嘗爲洗胃中塵

陳天成用東坡趙清獻高齋詩韻賦適齋次韻

二公晚辭軒冕勞兩齋莫辨適與高嘗登雲山仰清獻平地著屋山周遭白頭日過適齋下釣游尚想隨兒曹方從家舅與俱隱野鶴誰能鳴九臯加我數年未納祿解去簪紱甘同袍世間此事要識破差處不可容一毫穎川尉僊賦長句數寸之管煩君操欲追險韻繼坡老詞鋒犀銳真吹毛舅家見詩勉續貂長松相倚慙青蒿我今無復望祿仕不應招我更由敖

送元衛弟赴長亭鹽場

阿連生而秀二親所甚愛仲兄勤撫養遇事輒加誨幹

蠱靜而辦曾次無卑隘今焉職牢益官宇臨渤澥毋謂
官爲小要使所居大毋言才可了檢身到織芥我家門
戶重衣冠綿數代當以誠心求子視勿自懈亭民亦良
民孰謂俱無賴官吏旣擾之兼并責連債熬波亦良苦
樂歲色猶菜輸鹽不得錢何以禁私賣所在積蠹久良
法寢多壞吾聞不無術更當審利害熟視不爲謀空餐
媿難蓋不應行一切遽使絕稱貸富者能寡取倍息久
仍在貧者庶少寬公私可緩帶毋年登九十家居幸康
泰其家不從政禮經有深戒幸子去不遠時時可歸拜

小別不足惜輕舟送前邁

送從子沆宰郎鄉

小阮幼鍾愛長乃遭百罹風木旣深痛棣華更纏悲所
賴有吾子獨立守家規上有門戶託傍有孤與嫠忽爲
磨國行沂江秋爲期冬滂與夏漲漢水足險巖慘袪送
子去風帆不可羈城中楮爲幣邑下尤可知定知公事
少不必事作爲用智正惡鑿大道本自夷家無壯子弟
宗族各天涯幸有知己人方且把一麾四海皆兄弟官
寮善待之眠食謹調攝家務須自持俸薄用宜嗇無使

實漏卮此別動深念毋忘故鄉思一書抵萬金時寄賓
鴻歸

送高仲遠赴滁倅

高氏在四明于今爲清門貳卿道素高夫人德尤尊子
弟盡恂恂夫君更春溫昔年奉慈親定省嚴晨昏今日
當門戶友愛深弟昆伉儷信緣合端良由性根門中有
孤嫠極意均撫存與我親兒女次第了嫁婚不可解于
心肯自以爲恩不言而躬行後生熟見聞諸郎已秀發
穎異有佳孫鄉評共歸重內外無間言公勤官業廣所

至治不煩僊舟何遽西行行佐候藩環滁皆好山風月
當平分醉翁與樂全遺蹟今尚存況有賢使君易鎮方
北轅公餘陪嘯詠相映如瑤琨生來仕平進自此朱兩
轡從兄今鼎貴鼇禁兼掖垣君其繼英躅復收舊青甌
老我得投閒頻年接清歡同社摻君祛戀戀傾離樽梅
風吹溽暑祝君尚加餐

秋雨兀坐王原慶攜孫吉甫菊花倡和見過有分
遺之意次韻

五載杜門居海角無復翻堦賦紅藥自憐荒徑菊猶存

夕餐空待秋英落眼明喜見綠叢叢始也抽芽今滿握
扶筇著意養孤芳荆棘旁連細開斫天香入骨徐吐芬
中有秋風非外鑠傳聞南堂有佳種願過屠門思大嚼
頗亦有意欲見之此意未容兒輩覺乃知便許移芳根
不止園官供小摘要令壽客來駢肩何用潭水求延年
有時採之東籬邊不覺南山在眼前淵明千載幸同調
老我此際方悠然西風吹花日夜急散金坐看開田田
兩詩先到衡門下思向平臺尋戲馬從君九日去行樂
莫爲登高淚盈把

送王粹中教授入蜀

王粹中教授赴新蜀帥尙書黃公之招萬里有
行古調一篇贈別因誦所聞以求益雜然陳敘
不暇較工拙也

萬山四塞圍平陸大爲關中次爲蜀我生東南未曾到
蜀上游從聞頗熟自從襄陽上峻途高欲登天下臨谷
女媧大山塞空虛麻綫名堆千萬曲行人一升鹿頭關
下瞰平川如畫幅幅員二百四十里里出萬緡民日蹙
向來陝西五路兵退守諸關疆地促計臣權宜重增賦

民力尚寬隨所欲爾來因仍七十年鬼不輸錢無雨粟
民生哀哉不堪命外若富饒中不足益梓尚有繁盛風
夔峽窮民幾比屋側耕危穫供稅租飯多稊稗無嘉穀
朝廷謀帥弄印久宣諭尙書剖符竹尙書當今第一流
翁婿相望冰映玉貽書挽君爲此行古人義槩非流俗
君亦慨然挈家去摻袂未免再三祝君行豈爲溫飽計
一舉高飛快鴻鵠丈夫生有四方志登覽山川非碌碌
頃爲假吏到燕山未行先取山經讀所至訪尋多得力
中原至今在吾目北征西征昔有賦何肯從行空逐逐

子西嘗因過峴山遐想羊公欲相沃關右放買眼拔鏃
表留卒使癰潰肉試推此意向前去到處前人有遺躅
五丁開山果何在贊皇籌邊言可覆劔門石角皆北向
雪嶺界天望身壽高皇將臺在漢中武侯八陣留魚復
棧閣繩橋世稱峻威茂渡竿來夷族李冰離隼如底柱
大寧鹽泉若飛瀑四路尤多未見書買歸何止三萬軸
黃松次功蜀檣杙石湖居士吳船錄君宜豫攷經行地
卻隨所見書之牘幕中便可資籌策遠業因茲增蘊蓄
又聞瀘南不在瀘南在沈黎邛峽九折是君家世尤當

知藝祖按圖揮玉斧大渡河外等棄之本朝獨無南詔
患一語決定無敢違成都郡庠千白袍後來之秀日益
奇周公禮殿巋然在畫像盤古繼必犧春秋莫謁用舊
樂想見節奏并威儀談經酌史各專門學問可以相發
揮康節遺書有傳者不惜師問窮精微先天僅得十二
三聲音律呂無由窺更有異聞多細事試因餘暇質所
疑青城大面訪僊跡普賢多變窮峨嵋街名碁盤路九
遠江號濯錦如汙池古柏參天二千尺水滸鼎立三石
犀藥有珂貝說尤詭字書不見楫與棹金堂鸚鵡掃孤

塔蒼溪橘柚五出裨嘉陵梵像爲最巨閬州城南天下
稀少陵入蜀往來久須行萬里方知詩我慙寡聞言又
拙君其更爲加詢咨老我無復爲世用但當杜門待君
歸歸期未知果何時時寄尺楮寬吾思

山行歸來喜栽新竹

平生好看竹每見覺相與小大或疎密一一皆媚嫵恨
無地可種所至造竹所近方闢門徑得地尋丈許乞鄰
栽百箇參差正當戶天公有老眼惠以三日雨山行不
厭泥但喜竹無苦歸來報平安翠葉多楚楚不妨來子

猷奚必希蔣詡何當遠扶疎歲寒與君侶

小溪道中

晚出城西門循牆過南境夏橋日沈輝旅店月成影納
納川路遙聒聒水聲冷敲枕擁衾裯樂此寒夜永

醉題魚屏

五千買得見屏風白魚相逐菰蒲中俊尾潑刺有生意
旁人未易分雌雄屏後諸孫更雍容濺濺無數迷西東
我雖非魚知魚樂樂處未必魚知儂

范牛

人問吾何愛一牛范僊真筆倍風流繩牽雖未如自放
猶勝更著金籠頭

白醉

陶內翰清異錄首載開元時高太素隱商山起
六逍遙館各製一銘其三曰冬日冬月初出銘曰折
膠墮指夢想炙背金鑼騰空映簷白醉余愛其
言取以名閣陳進道惠示大篇次韻

處世難獨醒時作映簷醉年少足裘馬安知老夫味天
梳與日帽且免供酒事謫居幸三適得此更慚愧向來

六道遙特書見清異君家老希夷相求諒同氣曲身成
直身朝寒俄失記醉中知其天不飲乃同意書生暫奇
溫難與純綿麗

贈范緯文秀才

括蒼范牛自題云中興道士范子珉異人也淳
熙間武昌羅端良使君遠寄詩篇有贈畫牛范
秀才一詩愛玩不能去手時時誦之以寫云亡
之悲今十八年矣有范緯文叩門初談風鑿旋
及墨戲事自言視子珉爲大父行羅使君贈詩

卽其人也旣試其說草數語畀之

中興道士以牛鳴淡墨百果尤著聲妙入神品仍有靈
我不識之欽其名曾得烏犍兩橫軸又有石榴才一幅
武昌使君舊寄詩末言秀才乃其族忽有緯文來款門
自言真是當家孫口誦羅詩若翻水他詩歷歷俱能言
一見前畫歎真蹟願得生綃奮吾筆爲作來禽對石榴
一掃橫枝生意出我詩不工人已陳有詩豈復能動人
爲君一寫使君語更求知己如羅君

送陳表道宰南豐

與君出西郊送子之南盱子爲名父子才器真璠璣乃
翁老從臣循吏追兩都益公工擬人謂比王仲舒積善
必餘慶于公大門閭子能傳家學何止讀父書執喪真
有聞孺慕久不渝彈琴不成聲西上何徐徐文場嘗得
雋一跌重歎吁通籍金闈中夷庚因少迂邑中有三曾
聲名照堪輿士夫秀而文比屋多爲儒萬里此發軔胸
中有全模將別更求言老馬從問途乃翁同汪出親道
崇終初以規不以頌不自知其愚民社非細事況此壯
大區不飲第一策精神長有餘以此奉塵刹以此當萬

殊何官不可爲禍福皆在吾劇邑最爲難謹畏可無虞
試看悔吝者實惟予之辜民力久已困未免索稅租欲
如古什一攻瑟難吹竽古意行今法自應知樂輸有弊
勿遽革有姦勿亟鋤責己重以周檢束到錙銖兩腳踏
實地處事隨精粗頑不在斯民猾不在吏胥苟以明恕
行久之定交孚爲善無近名實著名與俱飲啄信前定
富貴不容圖三年報政成明時其舍諸老我世無用情
親肯自疎盡此一盃酒惘然摻子祛相依忽成別加餐
意何如

陳天成詩多和東坡韻茲因寄喜雨詩走筆謝之
一春垂垂困多雨雖曰如膏反成苦自知潦後必成旱
果見晴天雨黃土連旬不雨已嘆嗟滌滌山川雲不吐
未聞鶉鳩鳴屋角但有蚊蠅爭振羽一梅無望望重梅
旱魃爲妖無術禦閑居憂國俟雲霓夜夜三星正當戶
君王側身歎涼德雲漢之詩無媿古避殿減膳率以躬
已債縱囚真有補使君精禱盡誠意千里歸心稱杜母
四郊神物招螭蜒所在疲氓加手撫風伯在今誠可訟
已聞石燕空中舞時時小雨慰人心渴瓦流膏僅見乳

傳言望日當通濟老巫已得靈神語霈然三日果應期
靡神不舉誰爲主河流頓已復舊痕良苗喜見興南畝
中宵愁念不成夢摩挲便腹眠清午從今一飽便可望
抵京行見曾孫庾陳侯忽就春容篇徑遣長須入城府
歎君健筆今已老不草敕書招贊普坡翁相去已百年
時出新詩追步武

六月十六夜觀月翼早紀所見成長謠

海雲湧立雙鐵山明月正在山中間初疑漾陂藍田出
水面又似長風吹度玉門關須臾雲過月愈上太虛點

綴從飛翻白衣蒼狗不足究千變萬態俱可觀忽焉橫
臥如蒼龍驪珠領下光團圓山河清影見歷歷桂枝扶
疎若可攀夜深醉到雞鳴起光景不類居塵寰長庚擘
然朝曦發望舒猶掛西林端我欲呼吸晶華駐朱顏左
有金丹右玉丹昔聞兩曜在天如磨蟻日行日止一度
慳太陰行速朔必會金餅旋復成弓彎八卦萬物盡關
繫歷古不已真跳丸急景恂恍難控搏但見霞彩生爛
斑老我已復卦氣闌學道無成空自歎不如安坐委天
順一聽運化更循環

宅山堰

宅山吾鄉絕境也屢游而不及賦近過其上得
前四句而歸季夏鬱蒸午寂無事因足成篇寫
罷長哦遐想勝地寢覺風生兩腋汗垢俱清比
之陵陽冷語尤爲消暑上策也

宅山堰頭足奇觀百萬雷霆聲不斷誰把并州快剪刀
平剪波瀾成兩段四明山深水源遠衆壑會谿長漫汗
滔天狂潦不少留瀉入長江勢奔竄賢哉唐家王長官
欲圖永利輸長算想得慘澹經營時下上山川應飽看

西偏千嶺相屬聯惟有茲山擁東岸遂于此地築橫隄
截取衆流心自斷斟酌利害不全取高下參差僅強半
水大十分七入江徐挹三分供溉灌支流瀾瀾穿郡城
脈絡貫通平且緩旱時反此水亦足坐使千年忘旱暵
無窮廟祀報元功像設森嚴人敢玩梅梁天矯有冥助
大患于今尚能捍前輩所作多神靈日月真成赤心貫
後人小智或更易費盡工夫隨破散河堙盍浚謀不集
堤斷河傾流湛悍富民縮手人受殃仰望古人重興歎
老木號風波甚碧畫屏俯仰丹青煥更須積雨看驚湍

濡足褰裳何足憚去家不遠時一遊短艇垂綸流可亂
八月倘有僊槎來便欲乘之泝天漢

林復之求爲僧陳君舉爲寫山谷與俞清老詩而
和之次韻

歸墨氣何銳爲儒意何闌勸沮皆不可要惟心所安何
必收澄觀強欲加巾冠余看飲光衣以次傳阿難

送秦仲防制幹

秦郎相家子被服一寒士不味膏粱珍嗜書如嗜芟仕
途樂平進欲上行或止制使護瀛壖婉畫幕中試不避

癡兒譏但欲了官事君賢他可及好善無與比公餘仍
進學訪問無巨細片言苟有聞必欲窮根柢一介有可
觀窮閭必躬履老我甘投閒衡門人所棄惟君異時好
時來訪生死淡交久而敬清談或移晷一朝語余別揆
祛不容已向來二三公頗亦同臭味去去羣欲空今君
又行矣欲歸投金瀨尚眷甬東水結交多老蒼要路有
知己青氈我家舊勉旃取上第先聽傳除書使我喜不
寐別後未相忘毋愛書一紙

送蔣德常宰鄱陽

慕社頗寥落聚會多差參矧如夫君賢貴重雙南金豈
可無此君周旋相與深一別歸未久征輦又駸駸老我
苦多病別酒難重斟揆祛不可留贈言効規箴吾聞古
番君甚得江湖心官無崇與卑時無古與今古人乃能
爾斂衽當致欽我亦一丈夫毋謂力難任未暇言偃歌
肯彈宓賤琴明恕加撫摩細故多親臨網密吏易姦賦
重民弗禁飛鴉懷桑椹烹魚漑釜鬻此邦孰往來當有
慰黎黔君能踐世科朝行佇朋簪公餘昌遠業書讀松
竹林故家未見書校讎如向歆時時爲尋訪歸來共書

文苑集 卷三 三谷際岐校
淫勿以三徑荒間作莊舄吟勉哉赴功名莫待二毛侵
數年倘加我寒盟尚能尋

題家藏二畫

一龍

老龍臥海沙覺來未欠伸珠光發海底闖然日有神畫
龍不畫全必雜烟與雲此龍未嘗動具見爪與鱗一龍
望見之爭心生怒嗔奮迅勇欲前便爾雲滿身不知出
誰筆定非塵中人若非親見之何由寫其真雲濤方洶
湧恍若渺無津爲霖會有時正爾良苦辛乃知青雲高

不如寂寞濱深處或飛去什襲聊自珍

一虎

一虎弭耳行一虎立而顧猛鷲乃天資亦爾相媚媮媮
媮尚眈眈況復逢其怒吾聞宣城包今古稱獨步投老
筆愈精利牙爪可怖方其欲畫時閉戶張絹素磨墨備
丹彩飲酒至斗許解衣恣盤礴手足平地踞顧盼或騰
拏窺之真是虎捉筆一揮成神全威不露此其真是歟
爲我振蓬戶藜藿將不採何止讐狐兔

送陳進道倅三山

陳侯少有場屋聲歲在壬午聯薦名晚年倦游安里居
君亦懷綬歸家庭齊年連姻更同社臭味相與如弟兄
一朝話別欲遠去洗盞更酌歌渭城金沙樂土宜宦遊
或謂不減洛與京平分風月信可樂人家弦誦幾連甕
豈惟帥閫賴關決定知秋闈望陶成西都外司掌宗盟
須君共二爲之丞勿謂爲丞但虛稱亨途要當自此升
惟君儒雅聞簪纓種學歲久筆縱橫奧篇隱帙了如響
清談吐屑四座傾詩筒來往附郵傳時出妙語人爲驚
梅花萬樹照山白荔子百種輝空明九門雄尊盛官府

三山森聳多地靈長樂一志書不盡平生頗恨未經行
煩君傑句爲摹寫遠寄使我心神清

送姜子謙宰鍾離

濠梁自古揚州域禹娶塗山城尙留鍾離雖嘗作楚縣
子男之國書春秋卑梁爭桑起吳釁陰陵失道除漢讎
嬴秦屬之九江郡典午置郡任愈優蕭梁尤重北徐鎮
高齊又爲西楚州貞觀割淮疆理失元和加水號名脩
陽冰篆虎書戶冊奇畫于今照譙樓浮山築堰誰與謀
漫引童謠爲激溝役工沈鐵不勝計欲灌壽陽爲廢丘

霧昏三日水怪出一決空貽千古羞上格下格果何在
西濠東濠猶並流守邊在人不在險險阻如故事不俾
元魏擁兵數十萬義兵堅守竄其酋向來橫澗一失據
凜凜重貽宵旰憂刺史舊帶兩城使澗口兩城今在不
君侯妙年筆爲投名位詎肯卑微休世科高挹更膺仕
哦松壯志未足酬欲効金城上方略宦遊直到窮邊頭
三光五嶽氣猶分故疆慨想何時收邑事不足煩大手
往訪古今資遠猷老我無用重多病爲君相與數觥籌
慕社冷落故人少况復臨風送行舟看君徑赴功名會

努力自取公與侯又聞魚臺在近境誰知魚樂如莊周
烽沈柝靜若多暇從容何惜觀游儵

送瀟丞剡川

工部丞岷丘我生丁巳年比吾旣逾冠再轉丞金困年
齡過半百奏子哦松軒親見勤小物如彼少壯然受輸
導行費略不取一錢飛糠至眯目猶恐勞弗宣汝方壯
有室行行貳剡川地近旣便親俸外有圭田惟當念爾
祖奉職罔不虔邑無不當問事亦不得專退無爲避事
進勿至侵權莊生才不才其間要求旃去年苦旱歉穀

熟殊頗偏未知催科時何取何當蠲一十七鄉民戶口
富人烟去天曾不遠媿惡易以傳大寧九十餘父母俱
華顛況子勤幹蠱豈不深愛憐食祿須盡瘁毋歎我獨
賢不應頻往來恃有檄可沿時時寄安書何殊在目前
秋賦已復近公餘更加鞭金曩喜接境一水通鄉船他
時倘少病尚能催擊鮮

送王知復宰建德

筮仕一何早字民一何遲歷歷三十年中間多險巇宦
途祇平進分寸窮攀躋最後官胄監一蹴黃金閨祇由

能自愛風鷁甘退飛寧爲紅蓮幕往尋武陵谿親黨多
勸止君去獨不疑治家有賢媛應門委佳兒安居捨大
厦列屋閒歌姬風霜登客路單車如雞棲勇決有如此
端是英雄姿有志事竟成不後一年期明詔趣鵷班壯
縣催瓜時贏得爲君子否泰相因依古郡足瀟灑年來
困征追守宰俱賢明斯民其庶幾杭葦欲走別有足如
繫維舉酒向西望離愁渺天涯惟君才素高邑若不足
爲謂難易將至謂易後難支老我百念冷安能效良規
猶記簿領初過庭聞舊詩惟畏爲過寡惟勤無功虧遺

訓儼如在終身當誦之

題趙尊道渥洼圖

趙尊道制幹以龍眠渥洼圖示余余曰誤矣本
韓幹馬東坡曾爲賦詩者此龍眠所臨而以後
爲前俾易之爲書坡詩于後而次其韻馬實十
六坡集詩云十四匹豈誤耶

良馬六十有四蹄騰驥進止紛不齊權奇侷儻多不羈
亦有顧影成驕嘶或行或涉更相顧交頸相靡若相語
畫出老杜沙苑行將軍弟子早有聲中間名種雞羣鶴

無復瘦瘡烏暮啄當時玉花可媒龍後日去盡烏呼風
開元四十萬匹馬俯仰興亡空見畫龍眠妙手欲希韓
莫遣鐵面關西看

題高麗行看子

高麗賈人有以韓幹馬十二匹質于鄉人者題
曰行看子接處黃綾上書韓幹馬表飾以綾尾
以精紙皆麗物也聞其懷金來取因命工臨寫
而歸之再用東坡韻書臨本之後

竹批雙耳風入蹄霜鬣剪作三花齊相隨西去皆良種

撼首勢竄迎風嘶丹青不減陸與顧麗人傳來譯通語
裝為橫軸看且行云是韓幹非虛聲圍人乘馬如乘鶴
人馬相語同呼啄中有二匹真游龍爬梳迴立綠楊風
賈胡攜金贖此馬亟呼工人臨舊畫我詩無分到三韓
寫向新圖時自看

跋李少裴修禊序

唐文皇之賜韓王有崔潤甫之題為可攷若李
重光撥鐙書斷然無能效之者其為真筆何疑
朱徐開皇之記則已見少裴之辨開元去貞觀

未遠潤甫又職校定四部圖書以為最善本則
真善矣辨才之本既殉昭陵今世止以定武本
為第一又出歐陽率更所臨石本自應在墨跡
之下則知此本信為冠絕蓋希代之寶也然攷
之新舊唐史崔湜弟液滌及從兄淮竝有文翰
居清要液至殿中侍御史液弟滌明皇用為秘
書監出入禁中後賜名澄如此則液為湜之親
弟而為秘書監者滌也又宰相世系表博陵安
平崔氏仁師相太宗高宗次子擢擢之子液吏

部員外郎第四子挹挹之子湜相中宗湜之弟
滌秘書監如此則液爲湜之從弟又不爲秘書
監傳之興表已自不同而滌之親筆乃爾于是
知作史與攷古之難也因併述之仍賦長句以
副少裴好古之意

蘭亭修禊永和中羣賢高會俱雍容右軍作序亦寓爾
藁草乃致傳無窮自言疑若有神助他日屢書終不同
歷代傳寶在秘府尤其甚者唐太宗當時搜取極心力
摹本一一頒羣公惟此真跡最奇絕蕭梁開皇有遺蹤

親御奎文賜元嘉龍蟠鳳翥何其工辯才所取秘照陵

此本一洗凡馬空崔家兄弟列清要誨子況復稱龜龍
圖書四部資校讎當時尙有貞觀風自云此爲最善本
冰銜臣液題甚恭李王深得撥鐙法筆力絕勁雄江東
右軍以來皆妙筆名勝異代如相從病餘扶憊行掃松
李君攜來爲發蒙平生多看舊墨本一見使我開心曁
摩挲歎息不自已至寶盍入明光宮隱居懷寶正不惡
異氣或能牛斗衝叩門有客勿傾倒恐有御史來乘驄

送鄭楚客司法之岳陽

案原本脫去此首據集目
在本卷第十二首今從他

本錄補
于此

先生作賦真八吟高處獨步無古今少從三山來四明
一郡士子多青衿我嘗學事六七載膏馥沾丐資之深
竊名文場掌帝制至今不敢忘指南英英二子俱秀爽
遺以一經無贏金長公奉母上巴陵念君遠去因論心
見君詩編筆雖敏三嘆未見朱弦音海濱熬波幸解組
未知宦路多嶮嶽先生賦編更熟讀非止駢儷誇詞林
其中關鍵妙一世字字諧協如鳴琴談經況有著述在
持論肯爲向與歆青箱但能世其業前躡雋軌將駸駸

君家曾無錐可卓遲次幸此突不黔不惟母老身非少
廉介又務循官箴量入爲出可不謹斤斤飢食寒有衾
非求多藏第約己瓶儲紙裹迹可尋法曹持平守三尺
平反一笑神所臨謹毋失己毋失人同列當和時盍簪
上官善事免曠職首上尻高宜致欽岳陽樓號天下稀
地坼吳楚連衡郴洞庭漫汗天立壁君山當中出青岑
向來命名字以楚宦游直到重湖潯登樓談笑領僚屬
風流欣遇賢侯任君行應得江山助新篇寄我毋浮沈
摻祛欲言不盡意更取濁酒從君斟

太守任
洙道原

攻媿集卷三

攻媿集卷四

宋

樓

鑰

撰

古體詩

趙資政建三層樓中層藏書

危樓傑立潭府雄
 仰望驚瞿何穹窿
 擎以八柱真良工
 恍如木天移海東
 扶欄三級橫復縱
 八牕交映光玲瓏
 更上一層迴不同
 歷覽萬象俱空濛
 東南太白金峩峩
 西山千疊青芙蓉
 環遶不斷如屏風
 平疇彌望禾芄芃
 城郭市井聚螳蜂
 烟樹高低知幾叢
 澄湖一片磨青銅

潮來江漲銀在鎔海市三垂屬提封四山寬圍城在中
地平樓小望易窮安得高臥陳元龍麗譙公府難從容
二閣均在道佛宮江山得助無遺蹤眼前突兀忽此逢
主人幹國成棟隆鼎彝久書柱石功名遂身退茲明農
卜築深靜依高墉百間朗朗羅心胷咄嗟不待馨鼓襲
最後奇觀凌虛空牕戶未須濕青紅似聞廬陵周益公
亦作此樓高于崧相望落落見兩翁心匠不謀如影從
我欲效顰意方濃一朝登眺若發矇不願侍公飲十鍾
不願舞女紛歌僮插架三萬牙籤重此身願爲書蠹蟲

不然相陪夕陽春與公憑欄送冥鴻

再題行看子

先引護欄毬子驄九馬近遠俱相從黑駒駟黃騅素驪
亦有笏面仍銀鬃夏國一種青于藍五明錯靴皆如龍
或驂或引恣馳驟坐覺隱耳聲瓏瓏人間安得有此輩
一一必自天閑中不惟骨相異凡馬國入貴介多雍容
三花翦鬣自官樣空鞞更以香羅幪中間二者蓋天馬
齒雖已老氣尚雄不知幾出橫門道雙立柳下青陰濃
擡韉掉領刷背膂旋梳鬣尾搖清風人人生意馬欲動

王妙身
卷四
一五 恭
態度曲盡各不同韓生去我幾百年藻色尚濕青與紅
不知何時墮雞林萬里遠在東海東賈人攜來得寓目
一見絕歎丹青工千金可買真不惜忽復攜去何匆匆
亟令臨寫得形似如此神駿那得逢開元內外馬盈億
色別爲羣從登封韓生所貌定傑出七尺爲駮八尺駮
向來鶯邊繫金絨歸乘款段頭已童伏櫪寧能志千里
卻笑區區據鞶矍矍翁

寄題吳漢英玩芳亭

吳侯奕奕天分高歷記萬卷無差毫青雲垂上忽歸去

年來益收湖海豪志同三閭時則異玩此芳物亭之阜
視彼顛顛亦何苦鼻間栩栩忘鬱陶詩文滿軸寄海嶠
靈均細論無乃勞與君齊年況同袍祗今衡門沒蓬蒿
有芳可玩便自適草間野卉時一遭離芷辛夷蘭杜若
未暇一一追離騷

詩文皆以屈
平異同爲言

送孫子祥赴新昌主簿

高士不爲簿子嚴論獨殊不遭何不可而況主簿乎夫
君豈其裔南明筮仕初要知官無卑祿可代耕鋤正須
勾小稽使民能樂輸矧復兼尉曹鼠竊隨除驅兩職去

民近亨途此權輿君誠吾里秀質厚素有餘埋蛇有陰
德映雪讀古書起家決儒科鄉評足名譽妻以兄之子
相與久相娛小別不足惜未免摻子祛邑境連台剡好
山環四隅二子丞鄰封川陸通舟車乘興或一往徑欲
造庭除公餘想績文尤當惜居諸會看興公賦擲地金
聲如

送漳丞上虞

我老不復仕行將掛衣冠兩子俱貳令官職恰一般剡
川且書攷上虞亦之官人言易捧檄歸奉重親歡我意

正不爾期汝政可觀食焉怠其事古訓戒捨饒汝職與
民親簿書當細看一邑無不問正爾良獨難江海而三
垂長堤捍驚湍塿高幾如山潮至不留殘宣和有遺迹
能使潮浸灘陂湖謹蓄洩可以救旱乾長溝濟漕運浚
治令通寬此皆丞所職勿憚心力殫江頭有東山永懷
謝家安邑有李與豐況復居二潘尚友更從游問學加
研鑽平時固知汝廉謹無欺謾涉世終未深送汝能忘
言故鄉去帝鄉舟馭多往還失己固不可待人亦多端
罔求違道譽善遣非意干窮達自有時此理真如丹聚

散不足較豈得長團欒閒靜我所便汝其自加餐有時
或乘興往來二子間踏雨送汝行浮家當游般走筆如
家書誰能苦雕剜

送伯中弟尉新喻

伯父盛德人伯中實暮子不惟能象賢氣貌亦相似幼
日讀父書結字得皮髓粹然金玉姿少日期千里寧知
游上庠蹉跎困名第晚始著青衫酸寒就一尉歎然報
瓜時往戍真樂事自惟羣從希惜別不能已中年重離
別況我衰如此親故例作惡況復于吾弟茲行豈得休

雅懷聊漫仕勿憚三年留江南富山水尉曹官雖卑去
民最密邇一日斯必葺職務毋少弛善保金石軀離觴
且同醉歸來畢婚嫁相從期暮齒教子以義方忍貧授
經史素業俱有傳見進未見止大兒方決科如摘領髭
耳子尚徐其驅中途聽捷喜

送張子宓分教澧陽

澧陽渺何許遠在天盡頭頃爲郡樓記圖志不可求王
侯錄故實頗亦費冥搜忠以申明著學有車公優外挹
蘭江水下俯僊明洲讀書記羣玉採藥思浮丘況得子

厚語謂冠漢南州見謂頗詳盡豐碑照城陬可憐城與
樓百姓不知修乃知尚有遺家傳載鄴侯張君將客授
蓋嘗敘其由爲我謝澧人聊以遮前羞君家世爲儒青
箱襲箕裘太立泊潛虛探蹟深可鉤君才兼數器博洽
誰與儔南廟推第一鷗鷺快九秋得官愈嗜學手抄不
能休館殿要人物衆寶登琳瑯演綸及視草如君眞勝
流蘭芷生顏色暫煩爲遠游君方俟瓜時相依意綢繆
樽酒接從容詩篇更唱酬論文究今昔析理到孔周老
我澹無伴摻祛不容留別乘澹庵子傾蓋當相投公餘

文字飲能思故人

送周君可宰會稽

作邑誠匪易況子之稽山銀茜視兩赤朝家知其難鼎
鼎數萬戶賦重民生艱山陵五雲飛辨護力更殫豫買
萬世弊法貪至于殘越人瘠已甚當饋幾發歎名臣爲
竭力減額宜少寬不齊物之情茲事終變翻箕斂及雞
豚詭戶多容姦竟未得要領條令何其煩通才善治劇
南康遂通班誠心試求之要使後可觀古仕不出鄉習
俗皆素爛東嘉嘗客授尋乃乘朱輻略如仕故鄉非意

不得干況昔攝邑久疾苦知民間故吏想猶在疲民知
長官宜若差易耳未免送以言權雖與正同事體終兩
般趣辦不計久爲眞事多端遇事勿生風三思庶能安
試登寬簡堂取我前碑看六一真格言坐右當銘盤向
來難奉母版輿今似潘外盡撫字勞退公悅慈顏蓮峯
聲望重待子興門闌勉哉發政譽行矣聞天關

錢清王千里得王大令保母甄刻爲賦長句

書家千載稱蘭亭蘭亭眞跡藏昭陵只今定本誇第一
貞觀臨寫鐫瑤瓊黃閔岡下得寶墨古人燒甄堅于石

大令親書保母銘況是當時晉人刻甄雖破裂文多全
妙畫遠過蘭亭鐫其間曲水悲夫字駸駸欲度驂騑前
我家阿連縛虎手更得退堂方外友王君系出三槐家
參坐會文眞耐久田丁初來獻小硯尋見津津若微溜
細看背刻晉獻之永和彷彿在旁右亟訪田家叩所從
始知墓崩隨意取大甄支牀得前段掀倒浮屠全尾首
字爲十行行二百十有七二字漏交螭方壺不復見
貞石摧藏松亦朽我得此碑喜不寐摩挲三歎歎未有
興寧甲子十四周更閱三年仍乙丑若非洞曉未來數

安知八百餘年後坡翁應未見此志金蟬之銘何絕類
又知文章有暗合智謀所見略相似二王遺蹤無所遺
誰知地下此段奇三君共爲成勝事至寶呈露端有時
越山盤屈獻與義付與耳孫世守之煩君更爲護幽竈
或恐意如猶有知

趙資政招賞川海棠次袁和叔韻

少陵千古詩人傑每見名花輒題絕錦棠無如蜀川盛
見說千林天染纈大篇短章合無數忍對此花舌如結
黃鵠銜子萬里來春光頗向東南洩棹閒老子攜春歸

移石鬱林表高潔崇桃炫晝不足言紅艷燒林疑益烈
棠梨小紅自退聽不待騷人定優劣兩登蜀道歸海濱
一琴一龜全晚節嘉招容我到花下春酒新篘公自挈
攀翻亂插人共醉十二金釵不成列袁安參坐爲長哦
同氣相求磁石鐵不須高燭映紅妝佳月自能明作哲
紅潮滿頰臥林間風流誰敢來分別

泉口淨明院晝寢

沙頭古招提往來幾經行茲來當春晝解衣愒西楹玉
立青琅玕小牕虛且明紙帳白如雪牀軟枕更平偃仰

四體適欠伸困思生須臾右脅臥徑入華胥城無人夢
自覺闐然四無聲林間婆餅焦悠悠時一鳴翻身更從
容意泰氣亦清連朝走丘壘百拜不遑寧老我久倦游
幸茲息營營衰相益已迫世念日愈輕自欣天與閒身
是半髮僧未能遂高隱庶幾保餘齡

賦蔣甥若水番馬圖

何處驅來良馬六騮黃參錯如花簇胡爲不作騰驤去
各有游韉繫前足胡人下馬俱少休背倚氈裘眠正熟
酋豪揀箭奚奴撚意欲射驥不遺鏃琵琶橫倚續續彈

一夫坐聽胡中曲臥擁提壺將引飲英氣虬鬚皆貴族
沙磧坡陀高復低天寒不見寸草綠我行燕冀頗見之
狼帽烏靴乃其俗勿云恃勇不知義要以赤心置其腹
嗚呼安得壯士健馬咸作使坐令戎虜爲臣僕

陳表道惠米纜

平生所嗜惟湯餅下箸輒空眞雋永年來風痺忌觸口
厭聞來力勅正整江西誰將米作纜捲送銀絲光可鑑
僊禾爲餅亞來牟細翦暴乾供健啖如來螺髻一毛拔
卷然如蠶都人髮新弦未上尚盤盤獨繭長線猶軋軋

盱江珍品推南豐荷君歸來攜來東知君正直如羔羊
貽我素絲踰五總僊丞本出從嘉穀色味俱同無餅毒
鼎深熟煮葱豉香大美元來加臠肉有時飯素毫以藿
饑口屬饜味更奇束皙一賦不及此爲君卻作補亡詩

盧甥申之自吳門寄顏樂閒畫牋

年來吳門箋色澤勝西蜀春膏最宜書葉葉瑩栗玉賢
甥更好奇惠我小畫幅開緘粲殷紅展玩光溢目巧隨
研光花傅色濕丹綠桃杏春共嫵蘭桂秋始肅趙昌工
折枝露華清可掬妙手真似之藏去不忍觸苟非歐虞

輩誰敢當簡牘又聞樂閒君古篆頗絕俗併求數紙書
寄我慰幽獨

題申之寄示春郊畫軸

郊原膾膾春意足細草萋迷芳樹綠雁鷺無數泛陂塘
羊牛相與隨芻牧幾年不泛浙西船恍如蘇臺俯平川
閒人憂國無他策但願好雨成豐年

六言問天池寶華

昔年曾賦虎丘猶恨靈巖未游天池之景絕勝寶華有
水倒流老矣不復西去夢入陶朱扁舟煩君爲我尋訪

能以新詩寄不

贈成都魯講書

焯字叔獻

君家江發源我生瀛之壖相望萬里外中間幾山川近
聞今子敬文價驚鸞鶴何由夢見之失喜瞻在前幅巾
聳英標銜袖出文編倒屣平生歡劇談河漢懸老我三
入朝廣識兩蜀賢相與論諸公與君最周旋自言隱青
城讀書三十年城中竹谿居肥遯遠市廛清谿擁屋後
綠樹環前軒一舟號橫雪可泝復可沿拂衣下三峽非
爲名利牽灑灑頌追古作海潮賦新篇舊依棹間公來乘

甬東船顧我何所取有懷俱盡言老親苦多病嘗藥冀
少痊佳客不容留欲著歸驂鞭間爲惡草具願君少流
連報無錦繡段贈有朱絲絃一別無復會摻袂意茫然
蜀山渺何許同聲惟杜鵑

趙資政當山堂

我公仁存心樂山心如丹平生經行處不厭行路難青
城及大面萬疊連百蠻捫參仰勝息亦嘗坐長歎功成
歸四明得地數畝慳怪城隅路窮際小橋水汪灣蕭條漁
家市中有屋百間危樓俯人世一看山四環堂深無他

景猶以城當山城荒披綠莎青青透棹間秀潤長滿門
坐對無躋攀日夕氣亦佳鳥飛相與還終日看不厭徒
倚十二欄有如擁泰華管窺見一斑况茲綠陰成連朝
雨潺潺濃翠真欲滴秀色幾可餐我家但環堵窮年困
彎跽出門得曠遠遙碧羅烟鬢有時碧雲湧半空聳高
顏須臾輒變滅欲駐良亦艱羨公得佳趣客我游其藩
悠然時見之重門勿令關

風琴

淵明有琴本無絃白傅偏喜聽人彈不如空中風度曲

隨風往來聲斷續非宮非商從君聽不中律呂無虧成
大如角韻來孤城細似蚓竅蒼蠅聲華亭夜鶴圓吭清
顛動長引寒蟬鳴或疑鳳唳叫霄漢又恐僊佩雲中行
使其似曲無別調安得自在聲泠泠蛙喧尚謂勝鼓吹
牛鳴猶以黃鍾稱絲不如竹亦漫語賴此七竅俱瓏玲
幽人院靜新涼生八風不問來縱橫短簟六尺午睡足
拂拂神來傳廣陵

送袁恭安赴江州節推

袁氏四世凡五公唐朝三相傳家風君家九代擅儒業

高曾藝苑俱稱雄大父謙尊古君子諸父名高表吾里
一門子弟更競爽挹取乙科自君始九江需次今幾年
去去淥水依紅蓮忘年論交正相與叱馭欲往難流連
老我秋來抱病久臨岐無由置尊酒祇從臥內叙離懷
戀戀摻袂仍握手鵬程萬里茲權輿平時義方師有餘
送人以言古所重雖誦所聞寧起予君看公孝與孟博
太守坐嘯仍畫諾一郡之政賴關決千里應須念民瘼
鄉州義事煩主盟纖悉于余無隱情處事條理亦爲政
知君出仕當有聲尊公亦入閩中幕公退著書端不惡

君才更得江山助簡書旣省尋家學君行遠業未可量
弟兄丹桂終齊芳老諄無庸況多病尚能留眼看翱翔
趙南仲寄王樸畫貓犬戲爲之賦

鬢髮兩狻猊胡爲到庭戶細觀畫手妙摹寫真態度意
足謝繁筆不待丹青汗亂掃腹背毛頭足巧分布尤也
如愁胡眉攢眼光注豈惟足生鼈垂耳紛敗絮掉尾固
自若狸奴爲驚懼側耳實畏之衝目猶敢怒誠知取形
似不吠亦不捕對之輒一笑聊用慰沈痼

朱季公寄詩有懷真率之集次韻

伊昔羊尹臨丹陽真率之名初濫觴香山尚齒當會昌
臥雲不羨坐巖廊七人各列官與鄉年德俱高世所臧
丙午同甲遙相望清談生風想琅琅耆英人物尤軒昂
賦詩遠追白侍郎文富歸休壽而康衣冠十二何鏘鏘
吾鄉五老如雁行至今月旦尚推揚家舅仕宦接王楊
眉壽遂及渭水姜我如傷禽趁鸞凰忽驚騎箕歸銀潢
向來雅約猶寶藏菜羹草具烹箠肪四皓中間有夏黃
藹藹義風誇句章年來抱疴久在牀同社闊別如河梁
君嘗遠宦踰沅湘又向封川憇甘棠瘴雨蠻烟暗枕椰

何時歸安朝士坊忽傳新詩几生光斂衽正色而寒芒
詩境幾成破天荒徐爲續貂未須忙靜揣歸期應未央
歸縱未衰亦老蒼暮年甘與子同裳何事相望天一方

吳少由惠詩百篇久未及謝又以委貺勉次來韻

江左一世稱名公首出劉惔與王濛自高直以天自況
何止數仞言高墉虛聲一傳實何在但知景附而風從
我朝諸公門戶闊普納萬象如虛空羣才俱入大鑪鞴
鑄人端如金在鎔又如東君一布令白者自白紅自紅
巖巖千載玉局老少年徑以吾道東首干樂全次六一

二公自是燕許宗奏篇六論初流傳四海一日俱承風
其間傑出六君子香薰班馬猶爲濃涪翁又分江西派
作圖序次由本中哦詩作文各務實薦鸚不愧北海融
坐令文物掩前代主盟豈非諸老功固知文氣僵混籍
亦許詩律沾徐洪宛丘諸黃接前輩宜有此甥風味同
蚤嘗決勝翰墨場筆端豪健誰爭工新篇句句多灑落
妙畫字字真玲瓏惜哉生晚百餘載歐蘇之門久登龍
尙茲蹉跎未闊步吞舟之魚溝豈容我方投老與世隔
映牕愛景方矐矐十年屏居可羅雀何人來顧一秃翁

儼然衣冠見吾子文書銜袖名自通向來兩卷餘百篇
諷詠至今未能窮更攜大篇如拱壁刻劃無鹽賁孤蹤
人言霜蹄騁夷路我今秋隼凌三峯愛余過厚擬前良
此事如何著得儂老我不入杞梓林嶧陽高隱如孤桐
平生習氣掃欲盡只有媿處著力攻子歸求之有餘師
惟知歎息錦繡胸時時杖屨許來往庶可歲寒相始終
龍潭丈室一筍穿入露滿其上因賦之

一筍入屋照座寒凌晨仍有清露溥益信露珠自根起
正如真水朝泥丸厦屋不應爲汝穿不肯屈節斜倚欄

干霄拂雲已在望且復自保青琅玕

早久無水王伯容分惠桃源大谿泉將以長篇水

至巳雨走筆次韻

七十老翁門晝閉終日蕭然無一事卻因不雨動衰懷
擁笏黃堂與祠祀兼旬旱涸舟不通井泉欲竭知無計
僮奴抱甕扣比鄰水不得清僅無滓舊時見說橫谿源
有水側出萬竹前攷之爾雅名洗泉頗思走介分微涓
去之一驛不易到午暑坐想空垂涎不知何人剝啄扣
我門惠以小罌童稚驚相傳啓封一勺挹清泚烹試茗

碗真增妍况當精禱已孚應三日簷溜傾潺浚病中一
笑誠莞爾城闔安有泉如此吳松四橋思陸羽白帝城
西歌子美何用中濡取揚子已覺清甘冰入齒前人所
品殊不定一下一高隨所喜老我住世能幾年引飲一
瓢幾子淵行見甫田取十千坐使遠近俱安然欲和大
篇不覺沈吟久擊鉢成章慙敏手

送瀟宰富陽

富春富山水地勝雄三吳壯哉十萬戶畿邑拱行都大
江橫吾前上下萬賈趨吾子丞剡川攝事姦已鉏試縣

力愈難勉旃立規撫治縣古有譜近頗多著書棹閒愛
汝厚誨語皆良圖老我不惜別所望安官居汝亦頗練
事正恐才尚疎我以熱肺腸有求應所須遇事費十思
一跌真不虞雖當從心年兢兢矩不踰況汝年方壯勿
恃才有餘據輪始窺井任誕寧失拘三年待汝歸二親
真倚閭

又送從子濯

二孫吾所愛別去殊關情阿剡將賞延伴子性亦靈煩
子善誘之他日使有成公餘松竹林共勉維誦聲

寄題林宗山巢龜

彼澤之陂蒲與荷有美一人傷如何潔清如許豈不好
紉蘭綴離何足多七十二鑽無遺策不靈于己徒遭厄
人生何用千歲爲願似巢蓮足清白

送趙仲禮守天台

棹閒社稷臣卷藏經濟手功名付諸郎秀出諸公右大
兒倅東嘉洗印去未久次子鎮赤城急流去何驟二者
皆爲親欲奉喬松壽況有戲綵堂可繼清獻後鄰封尤
便養榮侍各畫繡春風扇微和安輿雲出岫家傳吏師

法從政于何有還歸鴛鷺行金印當繫肘向來嘗佐郡
山川若僚友南渡多北客風味中都舊士夫喜公來紛
然迎馬首其中多故知頗問老夫否

贈相手文李道人

生有文在手縱橫殆天子其間動成字往往傳自古舜
衰梁武武老十子貢五季友太叔虞仲子竟歸魯仲弓
有鈞文宰我亦握戶敏士自文雅習道本因輔鄧淵彭
城符瑣瑣不足數李邵陶士行三公皆定數白帝矜奇
瑞見誚漢世祖何爲言禍福歷歷如君語自言傳希夷

妙處勝貌取見手知國封況此細紋縷研油燎梅檀始
見掌中虜何如一覽頃坐談樂與苦老我縮袖間不復
煩推步子其訪城中英傑在何許

跋余子壽所藏山谷書范孟博傳

山谷晚在宜州或求作字山谷問欲何書則曰
惟先生之意山谷許以書范孟博傳或謂南方
無復書山谷曰平時好讀此傳遂默誦而書之
舊聞此說又知在上饒大夫家願見不可余子
壽來入制幕博記善屬文偶談及此又出摹本

及尊公跋語始知其爲先世舊物也爲賦長句
宜人初未宜于人菜壯老人竟不振承天院記顧何罪
一斥致死南海濱賢哉別駕眷遷客不恤罪罟深相親
攘攘不容處城闔夜遣二子從夫君一日攜紙丐奇畫
引筆行墨生烟雲南方無書可尋閱默寫此傳終全文
補亡三篋比安世偶熟此卷非張巡巖巖汝南范孟博
清裁千載無比倫坡翁侍母曾啓問百謫九死氣自伸
別駕去官公亦已身雖旣衰筆有神我聞此書久欲見
摹本尙爾況其真輟公清俸登堅珉可立懦夫羞佞臣

葉處士寫照

頃在朝行葉處士光遠爲余寫照置于山林中
欣然自贊有云山林如許盍歸去蓋志于歸也
一歸十二年旣掛冠再寄一圖爲老人星狀形
容變盡非復故吾矣戲作長句謝之

老我舊曾官日邊隨衆年除仍歲遷母子日夜念鄉國
但欲共耕綿上田葉君寫照妙一世畫我形模在山水
有如虎頭貌幼輿正合置之巖石裏猶記有客爲諛言
盍更野服爲貂蟬我笑不答心不然拂衣徑得歸林泉

歸來歲月不知久十餘年中何不有此心炯炯尙如丹
只爲幽憂成老醜久矣與世俱相忘荷君念我應老蒼
新圖白髭添一二豈知雙鬢皆成霜兩圖對掛耿相照
顧盼從容成一笑更添松竹作壽星我已甘心就枯槁
人言姿態與真同如照止水窺青銅明知已非故吾矣
小孫指點能呼翁君居天街號稱首侯王生面羅左右
邊頭飛將新立功颯爽英氣照牕牖名滿四方求者多
千金造門君不呵能事固不受促迫應酬雖繁可奈何
胡爲有暇及衰朽楚楚裝潢意尤厚我今已是行路人

不須重累丹青手

送宣宗禹保寧軍掌書記

宣之爲姓世所稀暇日試爲君家推宋之宣公舍與夷
子孫相承此爲基或云出自魯宣伯元和姓纂言則非
西京功臣虎與義侯封累世皆宗枝盛哉雲陽宣巨公
光武稱其勝二龔豐爲司空懷在趙遙遙久矣無亢宗
君家本自太未來世以儒術爲家風尚及瞻識諸父行
君方髫鬣成孤童艱難歷徧屹中立五行俱下攻時習
自從一登賢士庭貴名日起人誰及舍選真似青銅錢

一躍龍門浪三級吾鄉驚喜破天荒歸見朋儔愈謙抑
 寶婺古郡名浙東往泛綠水依芙蓉如君入幕假途爾
 及今民事宜加工亨途萬里才發軔摻袂勿使金樽空
 從今家聲當愈大坐使宣氏崔盧同

攻媿集卷四

攻媿集卷五

宋

樓

鑰

撰

古體詩

林和叔侍郎龜潭莊

林和叔侍郎永康別墅龜潭莊以蜀中烏絲欄
 為寄使賦詩而書之

頃年曾記游花谿宗樞潭府谿之湄徘徊其上嘆秀爽
 宜有英才瑞明時巖巖林公天與奇勁氣不為金石移
 少以六義鳴上庠游宦所至英聲馳瀾翻薦口徹旒冕

通籍直上黃金闈出宰長城如卓魯至今遺愛人歌之
入朝一冠御史牙臺綱振厲先光輝光宗聖度如天大
俾承舊制形宸奎言所當言公不屈上喜抗直深倚毗
歷居三院上橫榻首尾獨擊及四期擢居小天不肯住
遠指章貢把一麾政成召節不旋踵神與清漲促公歸
代言批勅節彌勵藜藿不採非公誰竟以松班分制閩
海邦雖陋不鄙夷撫摩赤子厘一稔功利及物難周知
公方在臺我立螭臺省相望心事齊皇上初政公賜環
我居青瑣公紫薇時平論事同努力寄名雷霆如恐遲

我求外補徑投閒公亦出關喜相隨受廛親見賢郡侯
攀轅臥轍同旄倪公時自謂二宜去吏民猶誦三不欺
棠陰蔽芾勿翦伐萬人來往城南隄書來不復說餘事
頗言別墅躬鋤犁頻年日涉愈成趣去家三里共游嬉
首崇御札極尊閣又以副墨登之碑非欲自詫稽古力
鋪張聖德彰仁慈猶記殿上爭挽衣咫尺龍顏犯天威
坐以漢法當粉蠶廷臣就列仍紳綏篋藏常裾不容毀
如以折檻存軒墀公嚴十襲我書榜老臣追往空涕洟
吾聞一潭浩深綠上有怪石形如龜是爲古麗最佳處

通籍直上黃金闥出宰長城如卓魯至今遺愛人歌之
入朝一冠御史牙臺綱振厲先光輝光宗聖度如天大
俾承舊制形宸奎言所當言公不屈上喜抗直深倚毗
歷居三院上橫榻首尾獨擊及四期擢居小天不肯住
遠指章貢把一麾政成召節不旋踵神與清漲促公歸

地藏天作公發揮大谿橫貫地坦平演迤明秀山四圍
十峯歷歷可名數餘如芙蓉聳天涯獨此一山亘里許
中立壁峻難攀躋堂名娛老正東南比漢二疏公庶幾
海棠炫晝遶欄檻細數媽紅遍繁枝雜花滿地秀而野
何殊迂窳居洛師千歲靈龜巢蓮葉祝公耆壽登龐眉
桃花源杳號霞隱木奴霜後黃金垂深可藏書曠可射
初篁細香臨月池狎鷗渚邊鷗爲下觀魚梁上魚不疑
懸崖石橫筍斜出拒霜爲城媚清漪公旣垂車棄軒冕
鴻飛冥冥不受羈超然但欲適吾意抱甕直欲心忘機

我雖未到景略序盡錄無心圖畫爲花朝月夕景何限
想見晴好雨亦宜落霞孤鶩映西日多少空翠仍烟霏
此雖見之咏不足強欲著語是耶非兩守寶婺行或止
無由往叩山中扉舊聞趙公訪歐陽千里命駕如呂稽
清風明月兩閒人萬口猶傳樂府詩我雖掛冠病雙足
頌繫一榻當炎曦荷公雖若魚相忘尺書時來自緘題
屢索鄙書懶未暇又恐境勝難爲詞茲來督我語益峻
遠寄蜀絹欄烏絲爲吾贈詩仍就寫欲待相好無時衰
想像試作高堂賦身知難往心欲飛才固不多老更盡

況此病瘁神亦疲不如及今爲公作語成不工不敢辭
兩家子弟向後日庶幾二老同襟期

次韻黃文叔正言送日鑄茶

龍圖正言年兄寄日鑄貢品且以東坡詩中妖
邪奴隸等語爲病使爲直之旣與佳客品嘗比
平日所得者絕不同仰嘆鑒賞之精也細觀坡
公和錢安道寄惠建茶詩一時和韻反爲雙井
所牽後在北方和蔣夔寄茶則云沙谿北苑強
分別水腳一線爭誰先又云老妻稚子不知愛

一半已入薑鹽煎人生所遇無不可南北嗜好
知誰賢死生禍福久不擇更論甘苦爭媿妍則
是此老初亦無定論似不必深較輒次前韻聊
爲日鑄解嘲以資一笑

古人養老食而酌後人旣飽須啜茗唐稱陽羨顧渚茶
惠建之名猶未省小團花鞞靄雲龍競巧爭妍動天聽
要之造化生萬物甘苦酸鹽適其性古來水晶多異同
茶品知誰真得正芽新火活善調湯種類雖殊俱雋永
坡翁立論亦頗當一貶一褒何太猛北苑固爲天下最

未必餘茶盡邪曠越山日鑄名最高種在陽坡性非冷
父老不堪痛摧抑待以奴隸心若鯁草木端有地所宜
此品標奇惟一嶺祇因雜取應人須寢使虛名成畫餅
坡公殆未識吾真真者如珠光自炯白頭拾遺辨真贗
非是容心爲鄉井寄來雙缶妙絕倫病叟新嘗信僥倖
七盃自煎成水厄笑看腹似支離瘦

長生草

我方髻鬣時已復見茲草仲舅尉江陽奉親顏色好
門掛經冬蛛絲罩輕縞意爲霜雪殘白花乃明杲世間

三友外此有歲寒操年至十七八童心如木槁隨時到
柯山逢人細訪攷買之野人手何須訪蓬島嘗爲伯氏
壽作詩頌難老經今五十年得自江南道老我日就衰
歲月豈長保一笑哦子詩猶將伴梨棗

又次王恭叔韻

仲冬方寒荔挺出仲夏方炎靡草死若將朝菌比大椿
相去何啻千萬里金芝僊草不可見長生之草畧相似
少時曾識青青色今日得之乃真是天工矜憫輕喪生
故出珍苗普相示若言神僊可學致自是未得養生理

人爲天地最靈物野卉無情猶若此石間薜荔水昌陽
 卷柏生崖并葛藟是皆草中號長久未見懸空解葩藥
 柯葉不改耐歲寒土著青松那可擬不須丹砂訪葛洪
 毋用僊方傳李耳未知此種誰爲傳烏有先生子虛子

寄題閬風劉允叔月波

浮海思乘桴拾月或掛席何如閬風僊渤澥坐中得隱
 几時觀瀾黏天四無壁清夜水不搖孤蟾靜沈璧飄風
 一過之波光湛空碧萬頃玻璃田蕩以黃金液我欲從
 之游尙恐一層隔何當攜珍茶石井試餘滴

題楊子元琪所藏東坡古木

東坡筆端游戲槎牙老氣橫秋笑揖退廉博士信酷似
 文湖州

同倪正甫尚書游西湖

靈芝寺臨西湖倪正甫尚書曰此湖如賢者別
 久再見儼然如昨感其言而作

舊說西湖比西子君言西湖似賢士于嗟契闊十五年
 一日相逢祇如此南山北山兩高峯春波灑灑摩青銅
 未能蕩槩窮勝處倚欄一望開心胸老我掛冠隱田里

豈知再見烟連水小須夏日醉滿荷脫屣東歸甘已矣

贈犁春謝耕道

歸耕十三年此來殊欲然一犁正春雨君行欲何處我
方買紅船重歸尋舊廬君亦早歸來勿荒負郭田

訪李國器于包山同登寺後山庵

訪客包家山相與登層巔嶙峋巨石中屈曲扶欄干夜
來雨初過石罅時涓涓輕輿到岡頭大江橫吾前亭午
潮方盛千艘散平川道人茅三間花木羅後先揭來汨
京塵曠望爲洗湔山斷塔層層西陵渺蒼烟此道走邯

鄆歸心更翩翩

謝林德久正字惠詩次韻

老我甘投閒晏然十三秋茲來何所似反衣狐白裘京
塵素爲緇夢寐思首丘低徊未成去黽勉終自羞久聞
歌楚騷欲見知無由詩文惠盈軸一誦消百憂便當細
論文夜雨同春藟平生萬事了此去復何求尚貪未見
書痛洗千斛愁得此不翅足攜歸老先疇

次韻東坡武昌西山詩

黨論一興誰可回賢路荆棘爭先栽竄流多能擅筆墨

囚拘或可爲鹽梅雪堂先生萬人敵議論磊落心崔嵬
向來羅織脫一死至今詩話存烏臺憑高望遠想宏放
眼界四海空無埃黃岡踏遍興未盡絕江浪破琉璃堆
漫郎神交信如在石爲窟樽勝金罍鄧侯先曾訪遺跡
銘文深刻山之隈山荒地僻分埋沒二公前後搜莓苔
元祐一洗人間怨天地清寧公道開玉堂同念舊游勝
筆端萬物挫欲摧時哉難得復易失弟兄遠過崖與雷
北歸天涯望陽羨買田不及歸去來我爲長歌弔此老
慟哭未抵長歌哀

盛山十二詩具在石刻而不見于諸公集中唱和之
盛未有如西山者舊軸旣不知所在後來跋語亦僅
存錄本爾輒不揣和韻以寓弔古之意仍效周益公
用翰苑印章重歎二公俱曾佩此也

次韻雷知院觀音詩因敘家中銅像之詳

鼻祖家住江東邊推擇爲吏心靜淵朝朝趨邑過圯上
時見暗磧光煜然平時奉佛心至謹建立塔廟崇諸天
試令便介識所在退公始得來其前揮鉏去沙若有物
微見銅像傷其顛須臾衆覩全體見端嚴相好巧且堅

迎歸供養備精潔我家舊物猶青氈銖衣飄搖俱梵相
珠纓垂裊穿淮蠙雖非丈六黃金身他處像設無能先
不知何人妙陶冶底用五色增華妍自茲累葉永爲寶
如以衣鉢更相傳是時承平最盛際正在景德咸平間
畫工難貌天人妙劫風不動神光圓益知佛教來已遠
徧滿震旦尊金僊慈悲無量應成禱影響若與人周旋
耳則聞音目可觀此有妙理誰能詮寶光燄燄擁身後
貝花葉葉俱成全頂戴天冠工莫及中有一佛立不偏
有孫是爲鄉先生決科衣冠遂蟬聯大父持喪久廬墓

曾以此事形碑鐫起身月卿出爲郡殿上寤主以一言
易守鄉邦凡五年寵光赫奕當政宣移至湖心值兵燬
精廬灰滅因亡焉初聞諸父話遺跡興歎欲見無因緣
揚州伯父初賦歸慨念孝心感如參騫零丁募以十萬錢
里巷響應慶愈綿木工先爲小臺殿居以古像□□旃
後人事之加篤敬曰裊香篆長蜿蜒衰宗幸有此奇特
信知福利非唐捐安得東歸奉香火晏坐終老甘三椽

桃源圖

夷堅丙志載桃源圖畫事甚詳曾茂昭尚書以



所藏墨本題識其上後見遺余益信夷堅之說
不誣作長句以謝

桃源初傳武陵谿靖節作記人不疑其先深避嬴政虐
嘉遯與世真相違尙不知漢況晉魏子孫綿遠無終期
正如三韓有秦語傳爲神僊愈難知桃林洞府漁人窺
別有天地均四時意必智者塞其蹊不然將爲世所羈
後人想像作圖畫但見畫稚咸嬉嬉人家隨處成井市
畎畝頗亦分塍畦井鬼下照坤之維方土異人多崛奇
筠籠二版堅如鐵能刻景物窮纖微淨室給以酒盈斗

一昔圖成了無虧同寮欲求第二本版忽震裂人已非
夷堅志怪言歷歷何意今乃親見之未知桃源有此否
此事茫昧不可稽初疑長房縮地脈又似照影歸摩尼
巨麗寫成阿房賦牽連貌出連昌辭采女細數七十二
人言霓裳舞羽衣樓閣玲瓏在縹緲其間恐有太真妃
刻畫工巧世固鮮磨以歲月或可爲彩鸞唐韻已甚捷
未見神速能如斯尙有漁舟傍階墀咫尺安知前路迷
天聖已踰三甲子何人寶藏至今茲南豐丈人惠墨本
老眼增明失昏眵固知凡蹤不可到一夢遊僊猶庶幾

祕之十襲何以報贈子相好無衰時

吳山井

寒泉堂道流王德正屢求吳山井記而臨安圖
經所載甚略無可攷證賦長句以遺之

錢塘東南一都會西湖宛在高城外鑿爲六井引入城
唐相鄴侯功尚在吳山橫亘城中央左右江湖盡襟帶
寒泉迸溢清且甘發自靈源匪分派天目兩乳龍鳳來
秀氣所鍾此其最海濱斤鹵潤作鹹安得一泉獨滂沛
四朝駐蹕八十年民聚五方真衆大抱甕桔棹萬夫汲

飛泉仰流筒吸快大旱不乾潦不溢數里頽肩競分賣
人言神龍宅其下濟物陰功至今在川澤固多資灌溉
此井猶能濟闔閭皇家德澤如此泉福祚與之俱不改
代書寄內弟耐翁總幹

我昔生外家半世猶相依至今連牆居日日相聞知諸
表如羣從休戚真同之耐翁生而秀愛惜從兒時文采
旣俊發吏才人共推低徊久選調每每爲歎咨茲行佐
王人未到聲已蜚郵置屢得書論事語益奇使長首推
薦婉畫多所資近觀會稽編分析及毫釐益知足心計

薦書徧諸司正欲助才選非敢請以私惜君年欲侵正
以遠大期得書再三讀惘然增愕眙非所望于子所言
何肯馳江湖兩路間弄兵分潢池羽檄以時至廟堂日
三思調度供軍需發兵而四垂吾事誠可慮彼亦安能
爲豈曰白頭賊指日當誅夷使子任賊衝尚望羽扇揮
如何隔千里遽求奉檄歸長沙屹巨鎮洞庭渺無涯鄂
渚屯重兵上游藉兵威當思深遠謀胡爲先自萎此言
及同寮必爲人所窺歸以語閨門徒驚妾與妻無端使
稟議在此何爲辭望子置私憂志立官無卑張巡起縣

令力抗百萬師逆徒哽喉牙蔽遮賴渙濰韋寬守玉璧
臧質全盱眙丈夫立節義有才尤當施殺身以成仁致
命須見危讀書不念此萬卷終何裨但當安義命前定
無參差勉哉盡所職造物不汝遺况復受國恩當與相
維持今子仕高沙偶然脫危機正須加義方豈應使同
斯向也未得祿遑遑不自支旣入紅蓮幕圖進亦其宜
今日寧爲民此乃無聊詞歸來事若定又思登王畿胸
中空擾擾禍福不在茲倘能悟愚言便可知昨非著枕
必安寢食淡甘如飴老諄非強聒鄙見不可移少安當

母躁通籍看金閨

題汪季路家藏吳彩鸞唐韻後

舊說僊人吳彩鸞日書切韻歸毫端不應神速有如此
令人至今疑稗官相傳此事三百載誰知真蹟儼然在
筆精墨妙信入神間以朱丹倍晶彩法言初爲此韻時
曠哀文字覺後知寧知遂經謫僊手諱字曾闕民與基
經生矻矻盡精力摩以歲月或可得動翰如飛猶恐遲
一日一揮出心畫神僊之說云渺茫僊凡配耦尤荒唐
簫史弄玉乘鳳去藍田空說容裴航文簫之遇真是否

豈比虛名傳不朽五篇歷歷爲全書始信傳聞是真有
當時所直才五緡于今千金價未均十年蓋有數百本
未知幾本傳今人惜哉字畫太纖細後日傳之知幾歲
祇今已有字不全欲鐫翠珉固非易我踰七十方見之
暫借一觀聊自怡平生願見心便足何必更謀身後爲
隋開皇初陸法言與劉儀同等八人論具音韻燭下
握筆略記綱紀至仁壽元年始成切韻五卷比之前
人韻集韻略音譜等書已不羣矣後有郭知立等九
人各有增加惟天寶十載孫愐唐韻最著今世所行

廣韻則皇朝景德祥符重修遂至二萬六千一百九十四言而集韻又在其後也今以廣韻較彩鸞所書東有十七而此本止三字同有四十五而此止十九公有十三而此止于八蒙有二十七而此止于十二注文亦多不全況法言及恂二序今該立于唐韻之前彩鸞所書既名曰切韻又首書法言之序則其爲法言之切韻明矣傳記已誤曰孫恂唐韻今亦多以三書爲一或至謂廣韻爲唐韻而彩鸞能書之是皆非也且五篇其四皆于其首書凡若干韻而于上聲

獨闕序中辛得源偶言旁有闕文後人遽以東字足之爲諫議非也蓋諮議云

題汪宏甫三馬圖

玉花流雲照夜白開元尚想行天街韓李鄭君俱已矣
健筆誰能如順齋

樞密府雪後作故韓氏子舍也

平生好流水雅欲臨流賦澗谿或過之眷眷不能去青
山圍故鄉不肯入城府寧知開八表重來尋故步勢家
遺故居傳舍偶成寓軒楹立奇石巉巖高丈許三面立

屏障曲沼水深貯桂苒將半載未見有時雨新春積雪
餘簷聲夜如注曉起推閒窻石穴水噴吐下穿玲瓏餘
數尺成瀑布髣髴小龍湫雖微體略具退公輒對之相
逢歎遲暮有客與同賞酌酒更告語雖云京塵深燕坐
得幽趣懸崖掛長藤絕頂列佳樹微風一披拂墜點紛
無數吾方謀乞身信美難久駐未能寫成圖聊用賦長
句

謝文思許尚之石函廣陵散譜

余好彈廣陵散比見周待制清真集序石函中

譜歎味不已念無從可得文思許尚之中行云
家有此本後自武昌錄寄深歎雅尚又以知然
諾之不輕也因作是詩以謝之

叔夜千載人生也當晉魏君卑臣寢強駸駸司馬氏幽
憤無所洩舒寫向桐梓慢商與宮同慘痛聲足備規撫
旣弘闊音節分巨細撥刺泊全扶他曲安有是昌黎贈
穎師必爲此曲製昵昵變軒昂悲壯見英氣形容泛絲
聲雲絮無根帶孤鳳出喧啾或失千丈勢謂此琵琶詩
歐蘇俱過矣余生無他好嗜此如嗜芟清彈五十年良

夜或無寐向時幾似之激烈至流涕素攷韓臯言神授
託奇詭別姊取韓相多用聶政事近讀清真序始知石
函祕賢哉許阿訥自言家有此文君昔寶藏人亡琴亦
廢荷君重然諾寫譜遠相寄按拍三十六大同小有異
此卽名止息八拍信爲贊君遠未能來我老從此逝何
當爲君彈更窮不盡意

韓文公聽穎師彈琴詩幾爲古今絕唱前十句形容
曲盡是必爲廣陵散而作他曲不足以當此歐公以
爲琵琶詩而蘇公遂槩括爲琵琶詞二公皆天人何

敢輕議然俱非深于琴者也丁卯夏秋間嘗有一詞
謾錄呈所謂激烈至流涕者也

正聲第一拍名取韓相第十三拍名別姊又一本序
五拍亦有名第一拍名井里史記刺客傳聶政軹深
井里人也刺殺韓相俠累有姊曰榮韓臯知叔夜之
託于神授以避禍而不知名拍以聶政事又以見古
有此曲也鮮有知者故及之

王叔達以尉彭澤潛玉洞述見示

書巖已奇甚潛玉尤偉哉李君漫盤谷元子空崕臺神

不得自祕天應爲君開淵明如得此應不賦歸來

題董亨道八景圖

錢塘怒濤天下無誰將尺紙爲新圖賀家湖上如鏡淨
屢向烟波逢釣徒彩虹橫臥吳淞上洞庭一螺浮具區
亦曾泛舟彭蠡湖插立千劍名大孤廬山高哉不得到
歷歷五老聯香爐上鍾下鍾夾湖口半江清濁涇渭如
多景雄據金焦間夕陽微照海門山其餘知名不知處
赤壁但歌前後賦江漢至鄂始合流黃鶴樓前鸚鵡洲
瀟湘見說青如染道林岳麓橫清秋我欲遠遊嗟暮齒

蝶夢翩翩漫千里但欲絕江尋越山歸老故山吾已矣

魚計亭

平生信天公頽然不作計顧我雖非魚想見亦相似潛
深本其性魚亦非有意浮陽或在渚不能終自祕或爲
饑所驅危機在香餌輕絲引纖鉤性命困刀几魚以味
得烹我以名自累安得兩相忘客我從此逝

跋盧申之所藏韋偃三馬

名畫記言韋鑿工龍馬妙得精氣從子鷗善小
馬有小馬放牧圖傳于代思陵親爲再書尤爲

可寶申之求詩感而有作

嗟哉馬之生馳驟乃其性一爲人所羈寸步不得騁局
促閑廐中專俟圉人令調服無踈齧始可用朝請戰騎
冒鋒鏑或致隕其命繡羈非不華金狨號爲盛青黃木
之災此亦馬所病立仗尤貴重一鳴輒斥屏何如在牧
時臥起玩烟景豐草勝芻苳清波恣游泳韋侯擅筆精
幻出無人境思陵賜珍題昭回光炳炳身方縛名韉三
年慙負乘細窺樂寬閒悠然動歸興

宇文樞密借示范寬春山圖妙絕一時以詩送還

范生本以寬得名不學關仝與李成筆端自出一機杼
理通神會真其能橫披小軸屢到眼頗亦時能辨真贗
未見弘大如公藏茂樹喬山春爛漫此圖不是江南山
寒空青嶂疑商顏高高下下幾佳處莊家時有茅三間
橋梁樓觀各有趣一夫驅驢何處去安得隨入杳靄間
布襪青鞋踏空霧近山忽斷見遙碧天涯一望無中極
胸中丘壑誰測知鐵屋石人驚筆力鵝谿六幅高堂空
終日對坐心神融看罷爲我捲還客自此歸余境夢中
錢文季少卿以蜀中織成山谷書廬山高爲壽次

韻

七十衰翁年愈高，意氣銷盡湖海豪。平生萬事不翅足，
但欲乞身歸故巢。幾番掛冠不容去，歸夢屢涉滄浪濤。
縱使不去豈能久，命如槁葉風將飄。一陽來復值初度，
方念吹棘心天天。何期老友加記錄，乃爲衰朽親揮毫。
廬山高哉山谷字，蜀女織就新冰綃。安得東歸抱四絕，
雙鳧飛舄追王喬。張圖痛飲信一快，更須傳寶留兒曹。
慶朝非遠卻圖報，別當作頌齊崧高。

以太湖石響板爲文季詩

太湖中心洞庭山，千巖萬壑高孱顏。風濤舂撞自太古，
漱成樂石如雕剜。玲瓏中空窮變態，奇奇怪怪羅滄灣。
良工巧手琢威鳳，片雲承足同飛翻。叩之五聲八音足，
疑有僊風搖珮環。月卿蜚聲塞宇宙，文如九苞瑞世間。
祇今在治真若鳳，朝陽一鳴聞九關。先從鸚閣掌帝制，
徑上鸞臺領朝班。德旣不衰石不泐，祝公遐壽如彭錢。

次韻章樞密賦吳彩鸞玉篇

文簫躡彩鸞，夜半恐不逮。山深忽呼名，驚喜不得退。僊
謫無所逃，士貧何可耐。乃以三生緣，遂爲二姓配。至人

與凡夫伉儷豈其輩
鸞書以自給細字如玉碎
一一存楷法明珠茂瑕類
初如鶴比翼久若魚同隊
終日了韻編心畫亡呈礙
人間八百本終古知敬愛
玉篇尤可珍何必贈雜佩
倘邀千黃金雖貧亦當貨
摩挲惜見晚老眼看茫昧
墨妙饒精神筆勁含姿態
次第部居中盤曲法庫內
九齡美風度孟博信清裁
書拙無合作見此增愧慨
尤物難久假雪牕暫相對
遺蹤雖已邈真跡儼然在
輒效西子顰小楷書牘背

題太乙宮武林山贈易高士

易居求賦武林山日困塵勞無暫閒
我求掛冠欲歸去念此詩債須當還
武林山出武林水靈隱後山無乃是
此山亦復用此名細攷其來真有以
天目兩乳到錢塘一山環湖萬龍翔
扶輿磅礴擁王氣皇居壯麗環宮牆
湖陰一峰如怒猊勢臨城北尤瑰奇
吳越大作緇黃廬爲穿百井以厭之
從來有龍必有珠此雖培塿千山餘
中興南渡爲行都崇列原廟太乙廬
曾因祀事來登眺闐闐塵中有圓嶠
薰風時來洗袪暑綠樹陰陰隱殘照
我得暫來猶醒心羨君清福住年深
長安信美非吾土

項如集
倦翼惟思歸故林

寄題王以道寧蘭墅

百卉生深林無人皆自芳楚騷發妙意惟蘭乃能當我
欲效潞公賸種坡之陽不須強披拂風來味愈長君乃
先爲之滋畹雙雁鄉正欲生階庭聚書教諸郎父子自
同心久之不聞香老我行西歸一造君子堂勉哉篤義
方雙雁看高翔

蕉菴雜言

環植巒蕉數十株幻成方丈一屠蘇幾重青蒼兩邊合

四壁穿空一物無早涼日薄坐其下爽氣肅颯風來徐
此爲天下易生物不多歲月真可廬王愷謾夸紫步障
石崇安得青珊瑚寓居得地不畝許好事便可傳規模
顧余老矣豈久處後來得此自足娛若謂霜雪成摧枯
瓊臺瑤室今何如

号	31155	年
		月
		日
		时

道

